

## Litholoana tsa Boqhoku



### SABATHA MANTSIBOEA

#### Bakeng sa Thuto ea Beke ena Bala:

2 Tim. 3:1–9; Ezek. 14:14; Bafili 4:4–13; Liprov. 3:5; 1 Petro. 2:11, 12; Mattheu 7:23; 25:21.

#### Temana ea Khopolo:

“Le be le motsamao o motle hara bahetene, hore tabeng tseo ba le sebeang ho tsona, joaloka hola le le lisenyi, ba rorise Molimo mohla O ba etelang, ha ba bontšisa mesebetsi ea lona e metle” (1 Petrose 2:12).

**J**oaloka liqhoku, re lokela ho phela joaloka lipaki tsa Molimo Oo re o sebeletsang, eleng se bolelang hore re tlameha ho kenya tšusumetso e matla hara bao re phelang le bona, tšusumetso e ntle. Ka hona, pale ea rona, hase ho arohana le lefatše leo re phelang hara lona, empa re fuoe monyetla oa ho bontšahatsa tsela e betere ea ho phela ho ba sa tsebeng ntho tseo rona re li filoeng. Boqhoku ke ketso ea ho thuthuha ha re ntse re bolokile pitso ea Molimo ea ho phela maphelo a khalalelo. Molimo O re fa bokhoni ba ho phela ka mokhoa o fapaneng le oa batho ba bang lefatšeng lena (2 Bakor. 6:17), 'me ba bang ba tlameha ho bona ba be ba botse ka oona. Ke ka hona re bolelloang: “Le mpe le tšabe Morena Jesu lipelong tsa lona: 'me le itokisetsa kamehla ho ikarabela, ka mosa le ka hlompho, ho ea le botsang tšepo e ho lona” (1 Petro. 3:15).

Thuto ena ea ho qetela e tla shebana le melemo ea motho ka mong, litholoana tsa semoea, sephetho sa katleho, tšusumetso ea rona, le senotlolo sa khotsofalo bophelong ba qhoku, re tseba hore tsohle ke ka “Kreste ea ka ho lona, tšepo ea khanya” (Bakolose 1:27).

*\*Ihute Thuto ea beke ena ho lokisetsa Sabbatha sa la, 31 Hlakubele.*

## Boqhoku le Khalalelo

Khalalelo ke sehlooho se pharaletseng. Batho ba nang le Bo-Molimo ba phela maphelo a khalalelo (Tite 1:1), ba tšoana le Kreste ka moea oa thapelo ea teboho le ka liketso tse mo khahlisang (Lipes. 4:3, Tite 2:12). Khalalelo ke bopaki ba tumelo ea 'nete 'me e fumana tšepiso ea bophelo bo sa feleng. Haho filosofi, borui, setumo, matla, kapa ho tsoaloe o le ngoana morena tse ka tlisang tšepiso e joalo.

**Bala 2 Timothea 3:1–9. Ke sefe seo Paulosi a re hlokomelisang sona moo seo ka kotloloho se amanang le bophelo ba qhoku e tšepahalang?**

---



---

Buka ea Jobo, e fana ka tlhaloso ea semelo le liketso tsa Jobo. E hlalosa kamoo bophelo ba khalalelo bo bonahatsoang kateng, le hara mahlomola a maholo. E boetse e re bontša hore na satane o hloile bophelo bo joalo hakae. Le Molimo O oa ananela hore ho ne ho se ea ka fihlelang boleng ba tumelo ea Jobo ho ea kamoo a neng a phela kateng. (Jobo 2:3). “Monna o n’a le teng naheng ea Utse, lebitso la hae e le Jobo, ene le motho ea tsamaeang ka ho loka le ka bokhabane, ea tšabang Molimo, ea sesefang bobē.” (Jobo 1:1). Ka hona, re bona monna eo tumelo ea hae e neng e se fela ponahatso ea mekete ea selumeli, leha sena e n’e le karolo ea bophelo ba hae (Jobo 1:5). Tšabo ea hae ea Molimo e ile ea bonahatsoa ka bophelo bo tletseng khalalelo, le hara litoko tse tšabehang. Ho ba le bo-Molimo haho bolele hore ha rena sekoli, ke hore fela re bonahatsoa khalalelo.

**Bala Ezekiele 14:14. Keng eo temana ee e buoang e pakang semelo sa banna ba? Ke sefe seo ba nang le sona se tšoanang se tlamehang ho bonoa ho rona kaofela?**

---



---

Ruri, boqhoku ke ponahatso ea bophelo ba bo-Molimo. Liqhoku tse tšepelang hali be le sebopelo sa bo-Molimo fela, li hlile lina le bo-Molimo, 'me bo-Molimo bona bo senoloa ke kamoo li phelang, le kamoo li tšoarang lintho tseo Molimo O ba tšepetseng tsona. Tumelo ea bona ha e bonahatsoe fela ho seo ba li etsang, empa leho tseo ba sa li etseng.

## Khotsofalo

“Ha ke boele ka baka la ho hloka; hobane ke ithutile ho kholoa litabeng life le life tseo ke leng ho tsona” (Bafilipi 4:11). Haeba re tla khotsofala maemong ohle ao re leng ho oona, qetellong khotsofalo eo e tlameha ho tsoa kae?

---



---



---

H’a ngolla Timothea, Paulosi o hlalosa sehlopha sa batho ba babe “ba lekanyang hore borapeli ke mokhoa oa ho rua” (1 Timo. 6:5). Tlhaloso e ka bang betere ea barekisi ba thelefiseng kajeno e fetang ee ke efe? Ba etsa chelete e ngata ka ho bolella bamameli hore haeba ba tšepahala (’me “botšepahi” boo, bo akha ho tšehetsa boevangeli ba bona), joale bamameli bana ba tla rua, le bona? Ho lekanya maruo le botšepahi empa ele mohlala o mong oa lerato la leruo ho ipatile tlasa sekhele sa Bokreste.

Taba ke hore, ha ho moo bo-Molimo bo kopanang le borui. Haeba ho joalo, ba bang ba batho ba khohlahetseng ka ho fetisisa lefatšeng ba tlameha ho nkoa ba e na le bo-Molimo hobane fela ba baloa hara baruihali ba lefatše. Empa, Paulosi o ile a hanyetsa sena “efela borapeli, ha bo e-na le ho kholoa ha pelo, ke leruo le leholo” (1 Timo. 6:6). Bo-Molimo bo nang le khotsofalo maemong ohle ke mofuta oa leruo le fetang ohle hobane mohau oa Molimo o feta hole-hole hoba le chelete. Ka hona, re lokela ho khotsofalla “lijo le liaparo” (1 Timo. 6:8). Qetellong, ho sa khathalehe hore na re ruile hakae, ho tla lula ho e-na le tse ngata tseo re li fumanang, ebang re nahana joalo.

“Ho khotsofala maemong ohle ke bonono bo boholo, sephiri sa semoea. Se sa tlamehang ho ithutoa, le ho ithutoa ele sephiri. . . . Khotsofalo ea Mokreste ke moea ono o monate, o kahare, o khutsitseng, o bonolo, o ikokobeletsang le ho nyakallela tsohle tseo Molimo A fanang ka tsona maemong ohle . . . ke lebokose la setlolo sa bohlokoa-hlokoa, se khothatsang se bileng seleng bohlokoa pelong tse khathatsehileng, nakong le maemong a bosula.”—Jeremia Burroughs, *The Rare Jewel of Christian Contentment*, maq. 1, 3.

**Bala Baroma 8:28, Baheberu 13:5, le Bafilipi 4:4–13. Ke sefe seo re ka se fumang se ka re thusang ho phela bophelo ba khotsofalo?**

---

## Tšepo

**Bala Liproverbia 3:5. Ke molaetsa ofe oa bohlokoa o teng moo bakeng rona, haholo-holo karolong ea ho qetela, mabapi le ho se “tšepo” hlalefo ea rona? (Hape sheba Esa. 55:9, 1 Bakor. 4:5, 13:12.)**

Lepetjo le sepheo sa qhoku ea Molimo ke ho “Tšepa Jehova ka pelo ea hau eohle, u se ke oa itšepa hlalefo ea hau” (Liprov. 3:5). Ehlile, hangata ho bonolo ho bua ho feta ho etsa. Ke hangata ha kae ka bohlale ba rona re lumelang ho Molimo le leratong la Hae le tlhokomelong ea Hae ho rona, empa ebe re itšoarisa lihlooho ka ho ikhathatsa ka seo re tobaneng le sona? Ka nako tse ling bokamoso bo ka bonahala bo tšosa, bonyane ka likellong tsa rona fela. Joale, ke joang, rona joaloka liqhoku re ithutang ho tšepa Molimo? Kaho nka khato ea tumelo le ho mamela Morena ho sohle seo re se etsang ha joale. Tšepo ke ketso ea kelello eo ho seng mohla e felang ha e sebelisoa; ka nqe ’ngoe, ha re tšepa Morena haholo, tumelo ea rona e tla hola haholo. Ka ho phela joaloka qhoku tse tsepahalang ke kamoo re bonahatsang tšepo ea rona ho Molimo. tšepo ena ke mohloli le mochofane ho qhoku, ’me e bonahatsoa ke seo re se etsang.

“Tšepa Jehova ka pelo ea hau eohle” poleloana “pelo ea hao” e lutse e sebelisoa e le mokhabo-puo Mangolong. E bolela hore liqeto tsa rona li runya khubung e hare-hare ea botho ba matla a boitšoaro ba rona ho etsa seo re leng sona (Mattheu 22:37). Sena se kenyeletsa semelo, merero, le litaba-tabelo tsa rona—eleng khubu ea rona hantle. Ho bonolo ho tšepa Molimo nthong tseo u sitoang ho li laola. Maemong ana, ha re na boikhethelo haese ho mo tšepa. Empa, tšepo ea ’nete “e tsoang pelong” e tla ha re tlameha ho etsa khetho malebana le seo re ka se laolang, le ha tšepo ea rona ho Molimo e re etsa hore re khethe tsela e itseng. Baapostola ba bontša ho tšepa Molimo ka lipelo tsohle tsa bona: “Ka tlhaho, ba ne ba fokola, ba hloka thuso joaloka ba etsang mosebetsi kajeno, empa ba ile ba beha tšepo eohle ea bona ho Morena. Maruo ba ne ba e na le oona, empa a ne a kenyeletsa a kelello le moea; ’me sena motho e mong le e mong a ka ba le sona ea ka etsang Molimo oa pele le oa ho qetela nthong tsohle.”—Ellen G. White, *Gospel Workers*, leq. 25.

**Ke ’nete hore ho bonolo ho tšepa Molimo malebana le ntho tseo u kekeng oa li laola. Empa nthong tseo u ka li laolang teng? Ke qeto life tseo u hlokang ho li etsa tseo ka tsona tšepo ea hau ho Molimo e tlang ho supa hore na u lokela ho tsoa lekae?**

## Tšusumetso ea Rona

“Hobane khale le ne le le lefifi, joale le leseli moreneng” (Baef. 5:8). Paulosi o hlalosa phetoho ea maemo a pelo nakong eo e bonoang ke bohle: ha re “tsamaea leseling” (1 Johanne 1:7; Esa. 30:21), bopaki ba rona ba letsatsi le letsatsi la ho hlokomela boqhoku e tlabisa leseli le leholo lefatšeng le aparetsoeng ke lefifi. Jesu o itse, “Ke leseli la lefatše” (Johanne 8:12). Re bonahatsa leseli la Molimo ka semelo se tsitsitseng maphelong a rona a letsatsi le letsatsi hara batho.

**Boqhoku ba rona bo bonahatsoa joang ka tsela tse tlisang khanya ho Molimo? Ke tšusumetso efe eo liketso tsa rona li nang le eona ho ba bang? Mattheu 5:16, Tite 2:7, 1 Petro. 2:11, 12.**

Boqhoku bo mabapi le ho hlokomela thepa ea Molimo, empa bo feta boikarabello bona. Boqhoku ba rona bo bonoa ke malapa a rona, sechaba, lefatše, le maholimo (1 Bakor. 4:9). Boqhoku bo pheloang mesebetsing ea rona le bona bo bonahatsa khahlamelo eo metheo ea ’muso e nang le eona maphelong a rona. Ka hona, re ka susumetsa ba bang. Re bonahatsa Krete ka ho ba mosa le boitšoaro bo botle, eleng ntho tseo ’Mopi A li chaellang monoana. Boitšoaro ba rona mosebetsing le bona bo lokela ho lumellana le tšia tsa boqhoku. Mosebetsing ea rona ke moo ho bonoang boqhoku ba motho ea lokileng. “O tla bonahatsa tokelo ea hao joaloka leseli, le ho loka ha hao joaloka ho ela ha motšhare” (Lipes. 37:6). Tšusumetso ea qhoku le mosebetsing kapa a etile, ha e patoe “‘sephiring kapa tlas’ a morula” (Luka 11:33), empa e bonoa joaloka motse o holima thaba (Mattheu 5:14). Ha u ikitlaelletsa ho phela tjena lapeng le mosebetsing, u tla susumetsa lipelo le likelello tsa bao pota-potileng.

“Ntho’e ’ngoe le e ’ngoe tlhahong e na le mosebetsi oo e o abetsoeng ’me haho mohla e ingama-ngamang ka mosebetsi oa eona. Tabeng tsa semoea, monna kapa mosali e mong le e mong o na le sebaka le mosebetsi o ikhethileng. Tsoala eo Molimo A e lebeletseng e tla lekana le letsete leo a faneng ka lona hore le holisoa hooa kamoo Krete A lekantseng kateng. . . . kajeno ke monyetla le nako ea hao ho. . . bontša semelo se tsitsitseng se tla u etsa hore u be motho ea hlomphehang boitšoaronng. Krete O na le tokelo bosebeletsing ba hao. Inehela ho eena ka botlalo.”—Ellen G. White, *This Day With God*, leq. 243.

**Boitšoaro ba hao mosebetsing bo bontša tšusumetso e joang ho bao u sebetsang le bona kapa ba u bonang lapeng? U ba romella mofuta ofe oa molaetsa mabapi le tumelo ea hao?**

## Mantsoe ao Rea Batlang (Le ao re s’ a batlang) ho a utloa

Re melata le bafeti lefatšeng, ka leholimo le hloekileng, le letle, le tletseng khotso, leo eleng moo re eang (Baheb. 11:13, 14). Pele ho moo, re lokela ho phela mona. Kutloisiso ea Mokreste, haholo-holo joaloka ha e senotsoe toantšanong e kholo, ha e lumelle bo mankhane hona joale. Ke hore re phelela Molimo kapa sera ke phetho. “‘Ea sa ntoaneleng, oa ntoantša; le ea sa bokelleng le ’na, oa hasanya’” (Mattheu 12:30). Lehlakore leo re leng ho lona le tla bonahala, ka ho hlaka, mohla a khutlang.

**Nakong e itseng kamora ho khutla ha Kreste, ba reng b’ a mo latela ba tla utloa e ’ngoe ea lipolelo tse peli. Tsona ke life hape e ’ngoe le e ’ngoe e bolelang?**

### Mattheu 25:21

---

### Mattheu 7:23

---

Mantsoe a Kreste “‘ke hantle’” ke mantsoe a monate ho feta ohle ao qhoku e tlang ho a utloa. Hoba le kabelo e halalelang e khethehileng ea ho utloa se boleloang mona ho bonahatsoa ka ho baballa matlotlo a Hae ho tla tlisa thabo e ke keng ea lekanngoa ea ho etsa sohle seo re ka se khonang, hobane nako ena eohle re tseba hore topollo ea rona e itšetlehile, eseng mesebetsing eo re e etsetsang Kreste, empa ho seo Kreste A re etsetsang sona. (sheba le Baro. 3:21, Baro. 4:6).

Bophelo ba qhoku e tšepahalang ke bo bonahatsoang ka tumelo eo se seng se e na le eona. Teko ea ho pholosoa ka mesebetsi e bonoa mantsoeng a ba lekileng ho itokafatsa ka mesebetsi ea bona (sheba Mattheu 7:21, 22). Mattheu 7:23 li bontša kamoo boitokafatso ba motho ka mong bo senang thuso kateng. “Ha balateli ba Kreste ba khutlisetsa ho Morena seo eleng sa Hae, ba ipokellela matlotlo ao ba tlang ho a fuoa mohlang ba tla utloa mantsoe ana, ‘Ke hantle, mohlanka ea molemo, ea khabane; . . . kena thabong ea Morena oa hao.’” —Ellen G. White, *The Desire of Ages*, leq. 523. Qetellong, boqhoku ke bophelo bo pheloang boo ka bona, melao e ’meli e mehola, lerato la Molimo le lerato la batho, eleng eona cheshello e kholo ea seo motho a se etsang.

**Bophelo ba hao, le boqhoku bophelong ba hao, li senola melao ee ’meli hantle hakae?**

---

## Ho Ithuta Haholoanyane:

“Kreste O tlile lefatšeng lena ho tla senola lerato la Molimo balateli ba Hae ba tlameha ho ntšetsa pele mosebetsi oo A o qalileng. Ha re loaneleng ho thusa le ho matlafatsana. Ho batla tse molemo bakeng sa ba bang ke tsela eo thabo e ka fumanoang ka eona. Motho ha a sebeletse litaba-tabelo tsa hae fela ka ho rata Molimo le batho ba bang. H’ a sena boikhothomoso ho hang, ke kamoo a tlang ho fumana thabo, hobane o phetha sepheo sa Molimo ho eena.”—Ellen G. White, *Counsels on Stewardship*, maq. 24, 25. Nako eohle ha ho e na le bophelo ka kerekeng, ho ba le keketseho le kholo. Ho bile ho na le phapanyetsano e sa khaotseng, ho nka le ho fana, ho fumana le ho khutlisetsa seo eleng sa Molimo. Molimo O fana ka leseli le tlhohonolofatso ho Molumeli e mong le e mong eo eleng oa ’nete, ’me sena molumeli o se khutlisetsa ho ba bang ka mosebetsi oo a o etsetsang Morena. H’ a fana ka seo a se fumanang, bokhoni ba hae ba ho fumana b’oa eketseha. O etsa sebaka sa ho fumana mohau le ’nete tse ling tse ncha hape. Leseli le hlakileng, tsebo e eketsehileng, ke tsa hae. Bophelo le kholo ea kereke li itsetlehile ho faneng le ho fumaneng hona. Ea fumanang fela, empa ho se mohla a fanang, o qetella ho se mohla a fumanang. Haeba ’nete e sa phalle ho tosa ho eena ho ba bang, o lahlehelo ke bokhoni ba hae ba ho fana. Re tlameha ho fana ka thepa ea leholimo, haeba re tla fumana mahlohonolo a macha.”—Ellen G. White, *Counsels on Stewardship*, leq. 36.

## Lipotso Tsa Ho Qoqoa:

1. Ho tšepa Molimo ho tlisa khotsofalo joang? Ho hloka halang ho tšepa Molimo ka pelo ea hao eohle kutloisong ea motho? 2 Bakor. 10:5. Ke hobaneng ho le bobebe hakale hore “ntho tsohle li sebetsa hammoho” (Baro. 8:28) empa ho le thata hakana ho e lumela? Ke hore, ke hobaneng rere re tšepa Molimo, ’re fela re mo tšepa ka bohla ba rona, empa re tšaba bokamoso hakana?
2. Ka sehlopheng, botsanang potso ena e be le bapisa likarabo: “Ka mantsoe a sa feteng 25, u ka hlalosa boqhoku joang?” E be u botsa potso: “Ka mantsoe a sa feteng 25, ke hobaneng ha boqhoku e le karolo ea bohlokoa ea bophelo ba Mokreste?”
3. Bala hape Mattheu 7:21–23. Ho etsahala eng moo? Hobaneng batho baa ba bua ntho tsee tseo ba li etsang? Ke sefe seo mantsoe a bona a se senolang ka bona? Ke joang re ka etsang bonnete ba hore—le ha re batla hoba liqhoku tse tšepahalang, leha re batla ho phela maphelo a tumelo, leha re batla ho etsa mesebetsi e metle ka lebitso la Molimo—ha re oele lerabeng le tšoanang la thetso?
4. Re na le ho nka tšusumetso ea Bokreste e le ea motho ka mong fela. Empa u ka reng ka eona boemong ba kereke ea heno? Ke mofuta ofe oa tšusumetso oo kereke ea heno e nang le ona sechabeng?